

國學基本叢書  
茗齋詩餘



~~2953~~

上海图书馆藏书



A541 212 0006 1798B


書叢本基學國

餘 詩 齋 茗

著 貽 孫 彭



行發館書印務商



~~1587750~~

茗齋詩餘卷一

淮南彭孫貽弄仁著

十六字令

春睡

殘夢尾。何人念小名。鸚鵡喚。紅雨落朱櫻。

寓感

孤劍說。知君意未平。萬古恨。方寸負平生。

詠美人紅指甲

釵鳳小。垂幺首微搔。紅尖露。綠裏美人蕉。

南歌子

豔思

鬪葉輪千子。揉花罵八哥。眼語巧騰那。兜郎心上事。顰眉窩。

懷信弦弟。客五羊。

踏月還珠浦。觀潮祭鱸州。獨客海南頭。甯知深閣裏。倚西樓。

荷葉杯

春雨

花澀黃鸝無語。春雨。雨絲絲。絲絲連夕客頭白。愁織。巧催詩。

玩月

庭院梨花非雪。明月。月何如。月痕如水浸羅幌。簾上。獨窺書。

懷崔大蘧非。同信弦。客五羊。

萬里尉陀城下。旅館。百花中。蠻姬沽酒勸君。醉可憶。錦闥空。

南歌子

閨情

戴勝蠶兒月。茶蘼燕子家。朱門晝掩卽天涯。空鎖曉開夜合。合歡花。

摘得新

聽蟋蟀作

蟋蟀鳴。離人夢不成。夢中人萬里。月三更。消魂夜色難禁架。亂蟲聲。

望江南

垂絲海棠

游絲裊。睡色滿簾櫳。刻畫無鹽比西子。任他石醋罵東風。燕尾掠驚紅。

閨思

春眠起。餘夢滿天涯。柳絮飛殘夫婿粉。棠梨落盡女兒花。無奈不思家。

南鄉子

春暮

蛾綠成綿。馬頭孃賽浴蠶天。蠶豆花開香一面。驚電。霍閃流光紅一線。

如夢令

春遊

楊柳短亭官綠。紅杏小樓人玉。春思不成吟。墨瀋淚乾鸚鵡。鸚鵡。鸚鵡起舞柘枝眉曲。

上西樓

得日南書信

海天椰實初肥。荔枝稀。料得鷓鴣啼處。客沾衣。作書就。無來雁。向南飛。寄語隴頭春色。帶人歸。

昭君怨

首春二日作

兩扇版扉深掩。八尺湘簾自捲。並沒客兒來。水仙開。花下擁鑪清坐。只有閒人一箇。獨自據胡牀。一鑪香。

### 中秋

記得去年時候。雙眼醉扶紅袖。待月正當潮。鮑家橋。夜靜露濃如酒。潮滿銀河斗口。彈盡鬱輪袍。月兒高。

### 秋日蕩舟南山下

綠漲長川西壩。蕩槳豐山腳下。深水蓼花灘。把船彎。折葦烹茶煙起。驚覺鷺鷥沙背。路斷問魚蠻。出前山。

### 酒泉子

### 睡起

花落烏啼。睡起春愁亡賴。海棠梢。紅雨外。燕單棲。博山鑪裊煙成。蓋濕黏雙翠帶。蝶翻飛。花影碎。墜銀泥。



又

睡損櫻桃。鈿盒重勻金粉。黛痕深。愁隱軫。上心苗。粧成不喜上蘭  
翹。悶倚鳴鑪香燼。撥琵琶。犯花滾。月輪高。

點絳脣

折榴花有感作

折得榴花。繁英簌簌紅窗雨。種花人去。花尙留儂住。行徧雕闌舊。  
恨無尋處。傷心句。銀鈎小字。題傍庭前樹。

客怨和伯旃

煙斂遙天。雲山下有還家路。夢中歸處。暝色沾殘霧。一點江春釀。  
作濃花暮。少一句天低樹遠。人在蕪城賦。

春光好

花燭詞

朱戶啓。繡簾開。美人來。徐上香車。傍玉階。顛金釵。春夜不晴。不雨。香雲非霧。非埃。此夕飛瓊。尋伴侶。會瑤臺。

浣谿沙

嘲子服病

病起因春不耐春。春風不會不吹人。細君疼惜故嬌嗔。竹玳筍斜防雀口。琵琶盲算值臯神。那須絮絮惱卿卿。

閨怨

雲母屏深睡鬢鴉。被池春重玉交叉。羈人何苦不思家。夢裏斷雲收雨足。牀頭單枕卽天涯。薄情夫婿柰何他。

戀情深

本意

作惡東風輕薄絮。送教春去。斜紅繞臉思淹淹。在眉尖。女郎花謝

粉廉纖。側帽闖疎簾。雖則箇儂亡賴。不憎嫌。

霜天曉角

賣花。用蔣竹山折花韻。

睡起煎茶。聽低聲賣花。留住賣花人問。紅杏下是誰家。兒家。花肯  
賒。却憐花瘦些。花瘦關卿何事。且插朵玉搔斜。

寒夜怨

霜濃月晏。一枕愁如線。暗想桃花人面。炙手金猊香畔。鵝笙哨徧。  
簧澀音難辨。聽到玉鑪三澗。又被峭寒吹斷。

菩薩蠻

閨情

愁時瑣事兜郎做。悶時百事猜郎錯。何處不如他。碎郎手內花。擦  
人翻哎也。小啐勾人打。匿笑故裝嗔。叨叨絮絮人。

春愁。效東坡迴文。

絮飛花盡春餘雨。雨餘春盡花飛絮。人惜可憐春。春憐可惜人。句  
成愁字字。字字愁成句。愁更上高樓。樓高上更愁。

小兒暫詣長女家。寄女。趣兒歸。

燈前竹馬無消息。哥鸚子燕離窠出。暫覓小羊車。言過月姊家。春  
寒風側側。莫出門前立。冒雨寄當歸。索嬾金縷衣。

醜奴兒令

豔情

蕭嬾病起無情緒。睡損脣朱。淡掃文殊。雲薄春山黛有餘。夢中歸  
信凝思久。月上方諸。玉滴蟾蜍。懶寫蕭郎別後書。范陽鳳池院尼。穠  
麗明俊。作眉輕纖。

時人謂  
淡文殊。

卜算子

閨望

相約海棠開。花謝何曾至。郎處江流到妾邊。那有相思淚。  
看山。山遠江無際。盡是前宵夢裏程。江靜翻如睡。

睡起獨

巫山一段雲

豔情

錦臆嬰兒燕。紅屏姊妹花。睡痕和夢閃窗紗。梅香喚點茶。  
三縷。銜梳月一芽。多情薄命薄情他。風前嚏準麼。

堆枕雲

謁金門

怨情

孤枕月上透一分羅帳。直送花陰高幾丈。捲簾鉤蕩颺。  
相誑。添得今宵惆悵。恰恰難勝金鎖項。可憐花一樣。

昨日鵲兒

好事近

落花

作意亂紅飛。吹盡遊絲方落。燕子蠻將春色。轉花梢牆角。牆腰柳  
暗綠昏黃。積絮織簾箔。半雨半晴半日。哭東風姑惡。

誤佳期

本意

銷繳從前別恨。說道那回定準。起來三次剔銀釭。欲呪回心忍。呪  
也不相干。薄命前生領。唧唧蟲聲悉瑟瑟。沒箇人兒影。

洛陽春

用稼軒閨思韻

花底一春閒却。雨梳風掠。小姑情惡引人愁。也謔恁眞姑惡。鴉背  
細彊金箔。錦鞵綾托。分鸞一隻寄情人。認嚙底郎輕薄。

清平樂

春思

游絲自捲。人困春光軟。好夢剛成纔一半。又被鶯聲捎斷。  
日今年。多愁多病多眠。自是春歸容易。豈宜苦怨啼鶯。  
今春今

自詠

竹籬樂日。花月爲三友。萬事不如杯在手。努力花前飲酒。  
食躬耕。姓名不達公卿。笑殺吾家錢老。當今何用長生。  
布衣蔬

宋浦春望

川原成繡。熨帖春波皺。穿過小橋紅雨右。惹得松花盈袖。  
底闌干。粉牆半出秋千。到處韶光相惱。關心忒殺今年。  
碧桃影

春遊

春山如笑。笑殺鶯花鬧。花亦無情人自惱。多謝多情謝豹。  
側魚叉。綠楊盡處人家。驀地捕鮮船過。順流帶出桃花。  
板橋左

更漏子

齋中自遣

博山雲。沈水月。不及梅花清絕。茶白雪。竹鑪風。鉤簾香影中。無此  
事。惟搜句。思入鷓鴣啼處。填曲尾。補詩餘。烏絲研粉書。

憶少年

上巳

愁中春色。綿綿飛絮。青青芳草。道不如歸去。聽枝頭啼鳥。鶯立秋  
千門靜悄。海棠上月高風小。未清明寒食。已梨花開早。

阮郎歸

花影

無端花影上紗窗。冥冥春思長。一庭蜂蝶不聞香。隔簾人淡粧。隨  
月色。下西廂。枝枝橫繡牀。安排畫稿向迴廊。片雲糊短牆。



秋日放舟入南山作。

綠楊樹下暫維梢。白茅繩繫牢。隔籬犬吠竹門敲。喚人扛板橋。剛  
解纜。又停橈。樹頭垂酒標。瓦盆連盃入椰瓢。樽橫無力搖。

畫堂春

中秋樓望

西樓剛報月兒圓。瓊窗花影嬋娟。清光都到倚闌前。素面嫣然。露  
渲飛鴉初濕。雲橫睡鴨無煙。重明虛設小遊仙。儂只孤眠。飛鴉鬢也。睡鴨鐘也。

重明。遊仙。皆枕名。

花燭詞

鳳翹壓鬢雀釵旁。玉人小立凝粧。洗車花雨過高唐。流水車香。紅  
燭寸心雙照。白頭百歲難忘。燈花不暗夜偏長。占盡風光。

山花子

人日。嘲閨人。

今日新春始覺新。佳人未信是佳辰。誰把綵人金勝帖。箇人人。勝  
比箇人人可勝。箇人人日恰宜春。鏡裏雙人俱小小。小山顰。

眼兒媚

獨遊章有堂牡丹花下

和晴和雨釀花天。春醉玉欄前。畫樓香暖。繡簾風軟。蝶坐蜂眠。斷  
腸春色阿誰邊。何處不曾憐。多情紅雨。多愁紅黛。多付紅箋。

錦堂春

花燭詞

十二金釵引導。三千珠履相邀。仙郎何處尋仙侶。此地卽藍橋。月  
扇微開半面。霞裾不動纖腰。吹簫飛上秦臺去。跨鳳海山遙。

海棠春

詠海棠

晴絲裊盡風柔淑。簾影外軟扶紅玉。嬌眼泥春寒。睡殺何曾足。纖  
穠花雨催膏沐。嬌不起豔情無骨。燈下更消魂。花覺頻燒燭。俗名驚  
蟻日覺

花燭詞

鸞輶飛下瑤池路。猶一片綵雲遮住。若願見清光。只問蟾宮兔。月  
中丹桂三千樹。須直上雲梯一步。既到廣寒宮。定得嫦娥顧。

桃源憶故人

雪後。憶齋中蘭卉。

江天雨雪和愁凍。凍斷還山幽夢。遙憶蕭齋清供。窗影梅花弄。蜃  
灰斗室椒泥重。不放簾鉤風動。紙帳嫩寒誰與共。曾否蘭芽壅。

別思

簷前風馬丁冬鐵。好夢幾曾甯貼。天涯一片無情月。那管人離別。

別時盼斷歸時節。枕上相思鋪疊。魚臺城下魚書絕。萬點江天雪。

柳梢青

送春

春歸何處。子規苦勸。不如歸去。惜別東風。有情流水。薄情飛絮。柳條折盡官樹。教春住。如何得住。減損朱顏。添除白髮。幾番紅雨。

憶餘杭

追憶朱廣文

記得餘杭山下路。深入畫眉啼處去。破山寺下亂紅堆。到處杜鵑開。而今兌得餘杭酒。好客主人今在否。獨隨虎跡出西谿。天目採茶歸。

尋芳草

和稼軒。嘲人憶內。

這裏一雙淚。却愁濕那廂兒被。被窩中忘却今夜裏。上牀時不會睡。睡也沒心情。攪惱殺雪狸攏戲。怎月兒不會人兒意。單照見闌干字。

醉花陰

秋愁。和伯旃。

月到梧陰秋一線。細杵誰家練。家在月明邊。只隔銀河。半幅鴉谿絹。輕羅小扇流螢院。獨夜情難遣。絡緯掛簷端。萬緒心頭。夜夜愁千轉。

南歌子

吳山旅思

雨雪雲牀冷。湖山木葉疎。秋殘又過小春初。回首高堂歲晚斷音書。韞短須添線。衣單不掩裾。空閨小婦惜離居。抱蕊南枝消息近何

如。

怨王孫

怨思

夜半月上海棠乍放。偷喚小名。鸚哥亡狀。何處偏惹閒愁。最高樓。  
三更羅幙閒燈火。淒涼我。小喜燈花。可打疊夢來停妥。鐵馬丁冬。罵  
東風。

浪淘沙

閨况

鳥語近紗窗。商略流光。合歡人倦尙橫牀。幾度低回重昵枕。將息檀  
郎。枕上印殘粧。半臂收藏。暗將春色貯羅囊。侍女已知佯不應。自  
滅銀釭。

初秋樓望

斜月上西樓。簾捲銀鉤。閨中少婦不知愁。指點銀河鷗尾外。箇是牽牛。殘暑晚涼收。大火西流。露華秋冷濕衣鞦。花底夜香燒也未。低問鴉頭。

杏花天

春盡

絲絲濃雨韶華嫩。儘生受鶯窺燕問。恁情蝶害花勞頓。紅積地衣一寸。愁眠覺宮槐蟻郡。香燼墜金鑪鴨糞。春衫寬褪知因甚。人別月兒小盡。

壽三元閣羽士吳清琴

朱顏鶴鬢神仙客。未肯注長生丹籍。吳山高枕飛來石。閒看人間鼎革。喜滄海烽煙甯謐。暫遊戲紅塵紫陌。小春只記梅消息。忘却山中歷日。

折挂令

怨情

多愁。况又經秋。睡皺衣篝。銷瘦金軀。翠袖西樓。凝眸。別酒滴透江流。鷗鷺渡頭。衰柳難留。江口孤舟。邂逅相兜。倦繡相摟。生受綢繆。此後休休。

秋懷

舊遊。烏柏西洲。紅藕風柔。纖手塗篔。惟酒忘憂。今秋。重九。依舊南樓。報仇。純鉤。七首封侯。皓首丹邱。蟻鬪羸劉。腐朽伊周。曾否回頭。芻狗浮漚。

戀繡衾

和放翁漫興

詞一名廣寒秋。一名天香第一枝。二字短柱促韻。難于見工。偶讀輟耕錄。元人詞。亦效爲之。不能有加昔人也。



蠟屐櫻蓑斗笠篷。任村兒笑殺此翁。菜甲豆丁瓠子。素侯鯖何減萬鍾。一壺濁酒三升綠。縱行歌山灣水重。何用學於陵子。濫姓名高士傳中。

雨中花

別意。次伯旃韻。

香獸熏殘衣。懶脫更作意。羅裳帶絕。螢火窗前。蛩聲枕上。那管人生活。剔去燈花偏再結。閒池館涼天蘋末。馬首連錢。魚牋方勝。容易教人別。

河傳

春夜

庭下。花謝。所歡不至。可憐今夜。杏花飛盡。柳花飛不歸。暗銷金縷衣。春江夜夜江潮長。木蘭漿。盼殺闌干上。赤欄橋。獨吹簫。夜遙。一聲

紅月高。

寒食

寒食。今夕。杏花天。牆角秋千。水邊幾家綵裙飛。畫船。人前低眉聞杜鵑。微雨煙波平綠軟。雙燕剪魚網游絲捲。踏花歸。金獸扉。更衣亂香蝴蝶飛。

花開諸詞有一調幾韻者。有隔句遙押者。節短而音促。有繁聲而少餘韻。夫填詞之家。貴叶官羽。疊韻宜繼之以永言。曼聲則收之以急拍。河傳酒泉諸調。豈可施之檀板。紅牙閒哉。聊一擬之。亦邯鄲之步。不足學也。

虞美人

詠虞美人花

美人愁絕閒階立。無語朱顏濕。懊儂何事最情多。疼殺虞兮可柰柰愁何。子規三月傷心過。酸楚紅于醋。遺釵墜鈿不關情。一掐脂銷粉瘦可憐生。

鵲橋仙

七夕

填河有鵲。洗車無雨。河外綵雲如縷。人間何夕不歡娛。笑天上相逢能幾。  
牛衣婦泣。鴛鴦機夫戍。秋冷關山千里。空牀薄倖苦相思。羨一度一年牛女。

梅花引

和閨思

人如月。花如雪。風定秋千猶未歇。綠揚天。聞杜鵑。傷心無那。忽忽是今年。  
春眠泥睡何曾著。慵起屏山閒掠削。鏡雲收。罷梳頭。侍兒私聽。低語絮閒愁。

一斛珠

燕京秋夕

衰荷病葉。助人愁緒閒淒切。桑乾夜色蘆溝月。流火頻飛。點點螢明滅。思歸小夢輕于蝶。剪西風暗燈花爍。關河夜冷人蹤絕。萬疊青山。遮斷東南缺。

惜分釵

春睡

燈花乳。飛銀雨。朱樓月向屏山吐。鬢雲生。枕紋橫。小字低聲。小要留情。卿卿。侍兒睡。燈兒背。溫柔儘數羅衾內。熬殘更。沒殘星。好睡難醒。好殺曾經。惺惺。

踏莎行

憶遠

月盡天涯。花飛夢外。春愁百結如衣帶。只因春在惹多愁。如何春去愁仍在。紅雨泥乾。綠陰影碎。東風不管情亡賴。寄將離恨下江南。

逆風尙與歸帆會。

紅窗迴

曉粧

屈指來春一半。小窗內女伴。懶聽紮山聲喚。風略定。停銀蒜。裊花枝。歷亂。易惱心情。生小嬌慣。催掠鬢鬟。不喜梅香偷眼。使性重洗粧。勻面。又擲下金釧。

和周美成韻

恁的愁。濃似醉。月兒到牆外。洞簫按低一指。尖滴溜。心兒碎。擡春愁不起。靠甚花枝銷得慘楚。牀上獨眠。晌午沈沈過未。醒不成悶淹牽地。到不如真醉。

小重山

春去

窗外餘寒剪綠紗。東風吹不盡。一枝花。牆頭飛過別人家。晴絲裊。蛛網罩簷牙。春盡鬧池蛙。林端喧鼓吹。正平過。晚來新月直天街。風林下。三兩未棲鴉。

三元閣偶遇

窄袖弓彎翡翠衣。湘裙三尺水。不沾泥。倭蠻髻妥插文犀。誰家子。兒住若耶谿。幽意阿誰知。篆香私自禱。巧音低。萬千心事在雙眉。登車去。小住尚依依。

和秋思

御溝流水過銅駝。未央鳴尾角。掛銀河。藕衫小扇掩輕羅。故園花。影外月無多。清露濕顰蛾。隔窗螢火入。照停梭。良宵未審夢如何。攜燈看。且喜睡鸚哥。

夜遊宮

不寐

月上蘆花絮被。正好句吟成思起。挑得燈明惜無紙。下空階。拾飛梧。  
填句尾。疎漏如秋雨。點滴上愁人心裏。欲寫閒愁添研水。玉壺冰。  
峭寒生。明月底。

漁父引

阻雪趙村

白浪沒魚山。風雪扁舟懶下灘。青蓑不及煙波綠。皓首漁翁把釣難。  
守凍鷺鷥還。天涯千里。客况轉闌珊。環腳羊裘。蘆花絮被。且蒙頭。  
高臥。歸夢渡河關。

東坡引

曉起

綺窗紅日小。餘睡殘燈繳。水沈宿火煙猶裊。賣花聲恁早。賣花聲恁

早。小鬟呼未應。熏爐閒抱暖。玉手調歌鳥。鸚哥念句休忘了。春眠不覺曉。春眠不覺曉。

臨江仙

感舊

寒食清明都過了。只留春色三分。二分愁病一分春。盡情花外雨。不管柰何人。回首少年行樂地。酒旗歌扇消停。白頭倡女舊時箏。殷勤絃上月。曾照可憐聲。

唐多令

夢

暝色帶殘霞。簾鉤下綠蝦。隔牆頭已定昏鴉。趁早今宵尋好夢。逐明月。到天涯。譙鼓已頻擗。天河獸角斜。閃搖搖風動燈花。夢到天涯人不見。他夢裏。自還家。



西樓感舊

道是不銷愁。憑闌閣淚流。倚東風重到西樓。三十年前心上事。只今夕。聚眉頭。紅燭話難休。三更值女牛。暖羅衾再熱香篝。總是不眠思舊夢。怕重夢。少年遊。

少年心

閨怨。次山谷韻。

不是沒點兒悶。算愁來也無分寸。是當初奴忒恁。惹伊短倖。悔一霎真箇兒嗔。莫再薄情根問。若再恁折伊福分。欲便丟伊呵。除非真恨。無頭謎煞著也虧人。

蝶戀花

別思

抵死春風吹客去。倚徧高樓。春去關何事。今夜纔知成獨自。朦朧喚

起分明是。怪殺殘燈明不住。剔去殘燈。夢又無尋處。比較銷魂無  
第二。孤眠情況今番試。

河傳

戲兩和少游山谷

瞥時半面。意中心上。夢裏如經慣。月閉雲低。好殺人兒勾幹。落花風  
不方便。夢回金鎖橫門限。臂冷餘香。花影疑鬟亂。愁損也天巧。又  
流鶯低勸。我自愁誰耐管。

賣花聲

本意。次元人韻。

無價春光。買斷千紅萬紫。認天街蜂尋墜蕊。鸚哥夢破。叫小鬟提水。  
催遠山鏡中雲起。佳人聽得。問道花奴來未。恰粧成寶簪做美。兜  
鞵忙出。聞隔簾揀取。露一分瘦尖紅底。

其二

順趁東風。喚徧魏姚黃紫。數不盡姬英妾蕊。擔肩春色。深巷門如水。  
忽倉琅獸環雙起。流鶯同轉。粉耳玉人聞未。倩梅香添嬾貌美。低  
聲叫住。摘並頭奪取。恁嬌癡撒錢花底。

青玉案

秋雨

一庭殘暑將秋墮。風聒碎誰能那。無端添得愁無數。黃昏幾陣。空階  
點滴。都向心頭過。幽懷欲寫難題破。昏黑殘燈剔花坐。雨重濕螢  
如隔霧。虛堂似水。鑪香似夢。銷受淒涼箇。

天仙子

閨情

小院無人啼促織。絡緯遲遲錦機急。歡情薄似曉河多。日未出。先無

迹。鴛衾臂冷剛纔別。昨夜秋聲傳杵入。荷裳零落紅衣泣。因憐得  
藕惹人絲。中未的。虛相憶。空房易老風前立。

連理枝

七夕立秋。嘲信弦。

一葉梧桐早。報道新秋了。晚粧時候。曝衣庭院。日沈花杪。驗相思紅  
筋淚痕多。看羅巾多少。鵲噪歸期杳。河闊牛衣早。龍梭罷月。鴛針  
繡露。蛛絲織草。笑年年何處巧曾來。只郎歸湊巧。

歸田樂

次山谷韻

步徧閒庭砌。促織兒無端絮聒。聒得心兒碎。不是我恨你。你須念我。  
甚的情懷放教是。差那只有自己。算左從前千千計。雖伊奚落。甘爲  
伊憔悴。放下只睡裏。那得放教入睡。悔了還疼兩般淚。

其二

不爲伊銷瘦。兩月餘淹煎則甚。空道和他有。只我有你。你可有我。剗剗殺人也銷受。虧人已儘勾。削減裙腰多般皺。那回相見。肯放伊將就。早哩做夢裏。夢又不知那裏。只恐夢兒也非舊。

傳言玉女

詠雙蝶和劉文成。

病起春心。自笑不如雙蝶。草眠花宿。賣風情俊捷。羅幙繡戶。百徧尋香未愜。掃蛾豔質。羞他低睫。傅粉何郎。蘇蘇空自汗浹。舞衣零亂。驚流風落葉。生怕玉人相妬。輕羅吹箏。向花深處。恁情交疊。

憶帝京

次山谷韻

一點相思如梅豆。酸滴滴心頭有。驀地得相逢。索不恁難拋手。多謝

落花風。滾軟蓐相團就。花鳴啞蜂身酥透。恨殘更曉河明滅。如洗  
露華濃於酒。這腰肢一霎。柳條兒瘦。恐那回別後。又不比今儂慙。

弁州云。美成能為景語。不能為情語。是以價微劣于柳。能造為情  
語。刻畫次骨。藏穢敏於俚實。無如山谷。秀鐵面所謂當墮泥滓者  
也。戲摘數首。次其韻。意欲直奪其席。非特不媿之  
而已。然詩餘之義。銷亡始盡。豈非關馬之嚆矢乎。

祝英臺近

七月初八日。詠牛女。

疊鍼廂。藏錦幅。愁望隔河路。乾鵲催歸。且自慢些三箇。索性決斷銀河。  
不留橋塊。誰要恁烏鵲重做。漫分訴。回首昨夜佳期。却似已虛過。  
收拾歡娛。冷抱支機坐。不如窵女三星。匏瓜東畔。翻近他牽牛幾度。

御街行

和伯旃寓內庭韻

真茶滴乳濃于酒。吹筆簾嚴更後。天街人靜月明中。露滑絳河珠斗。

夾城鳳吹。穿花隱隱。風定還無有。御溝金水無聲久。玉鱗躍聞魚  
狗。周廬上直羽林郎。風骨幾人將肘。悔教夫婿。閨中夢裏。曾到漁陽  
否。

一叢花

初秋

藕花天氣試輕綃。紈扇倚風遙。三銖衣重嫌無力。飛絲摺印損裙腰。  
犀月梳收。麝雲鬢斂。妥髻坐良宵。冰肌無暑暗香飄。小喜頰紅潮。  
黃昏螢照羅幃裏。橫陳外河鵲成橋。道是忘情。幾人真箇。誰耐不魂  
銷。

金人捧露盤

詠茉莉

似梨花。爭香色。也輸他。浸炎月涼透窗紗。蠻煙瘴雨。未曾經過美人

家。淡粧清雅。粉肌膚。菽發含葩。犀梳畔。鬢雲側。翠翹下。玉簪斜。映雪質。積素無瑕。冰心自冷。不容香汗。漉鉛華。閩南萬里。隨清夢。吹落天涯。

### 驀山谿

#### 和山谷贈伎韻

人前可意。眼語郎休醉。斂笑又無言。肯逐豔春來。穠李如顰似喜。總不慣春風。殷勤語。倦遊人。略與花爭氣。歌容酒性。點勘閒情味。何處肯銷魂。出紅塵。一人頭地。而今相約。莫要更相思。若相思。不相見。兩點春山是。

### 爪茉莉

#### 春夜戲用屯田秋夜韻

不是春宵。那知枕上味。羅幃小。制情無地。雲沈雨重。不曉那雞聲。喚



碎。侍兒把絳蠟高燒。只增幾多燭淚。昏黃淡月。有情天也如寐。人靜悄。博山煙細。知更玉女。枉了冬壺傳遞。笑情人不到高唐夢底。肯放工夫睡裏。

滿路花

和朱希真風情韻

花低月影那。雨歇雲身破。濃歡貪未足。燒心火。羞眉豔目。一半憨裝裏。吹黑燈兒妥。恁意相兜。幾曾容霎時臥。一從別後。使性都成左。重門金屈戌。休教鎖。尋歡夢裏。好放情人過。只孤單的我。不柰他何。害殺人那遭呵。

簇水

問侍兒月上花梢幾許。戲和程邨韻。

候月司花。知更須擇康成婢。知儂心事。休耽誤燈前戲。心坎背燈私

語。所約牢牢記。諒月子可知人意。漏下矣。爲儂候棠梨木杪。紅影  
過闌干未。燈花可據。會月色昏黃意。花爲玉人弄影。已到紗窗裏。侍  
兒解事。暫時迴避。

薰蘭芳引

爲陳大催粧

春色梅梢。胭脂厚曉風香縹。正紫馬尋春。遙望入畫樓一簇。雲英天  
上。知此夕支機停軸。有傳言青鳥。報道黛痕新沐。扇月斜窺。鏡波  
低影。翠扶紅足。料今夜留心。略飲合驩暖玉。錦帶知情。朱缸解意。作  
燈花兩朵。暗遮雙宿。

滿園花

次少游怨情韻

此事人知久。搯斷伊衫袖。問是誰先肯從伊就。倒不如和伊說。先是

奴心有。幾箇更兒守。寡意的撇閃。反粧幌相儻憊。我如今再和伊也醜。並不眉窩皺。索不共伊交口。任嗑盡酸牙。不信無梁斗。伊今後。他處廝哄。謊殺我也多勾。

江城梅花引

閨情。用康伯可韻。

黃昏無伴立閒階。雪飛花。惜梅花。折得一枝何處寄天涯。約過小春春又過。百千徧。踏花行。澆繡鞵。繡鞵退些懊。擎擎。月一芽。雲半壑。可又瘦也瘦不上。鴛釵交叉。減褪羅衣。多半不爭差。判爲東風憔悴殺。憔悴殺。嫁春愁那一家。

八六子

燕邸清明。次伯旃韻。

禁煙時。江春已徧江南。蝶鬧鶯忙。奈旅館春光不到。柳絲短似鬢絲。

鬢鬢許長。行雲偶到高唐。夢裏那知是客。送人空復沾裳。拚取醉  
十二。酒樓花下睡鄉。寒食鳳城細雨。幾番和愁和悶。半逐東風吹落  
殘陽。九迴腸。春江可同淼茫。

魚遊春水

和宋人韻

棠梨花飛盡。柳絮成蛾吹陣陣。紅芳銷瘦。新粉著篁猶嫩。胃蝶簷牙  
絲半井。沒韞苔文茵三寸。花蝨低迷。蜂身酥困。怪道水紅衫褪。早  
是暗中催容鬢。雙雙乳燕飛回。鉤簾風定。未酸梅子懷仁苦。小破么  
荷胎珠暈。春歸幾時。悶來因甚。

詠朱魚

朱魚寬游躍。風動淪漪上簾幙。盆山嬰沼。如在江湖寥廓。千仞青旻  
藻鑑空。幾點流水桃花落。人影忽驚。萍翻撥刺。水面唼喁吐納。一

片斷霞生鱗鬣。何須水畜鴟夷。泛宅苕霅。如子終非池中物。非我安知魚之樂。尺水十洲。寸鱗三峽。

意難忘

次伯旃爲冰修病起惱香史作韻

病起當歌。把一春鶯燕。花事蹉跎。背人憔悴殺。可是爲儂多。非中酒。覺微酡。黛子遠山磨。拚爲伊文園生瘦。銷渴難瘥。爲卿小補雙蛾。已鬢絲斷送。一轉秋波。多情思自懺。無奈箇儂何。行不得也哥哥。儘銷麼瘦麼。索問他神君交接。素女方科。

滿江紅

和鄂忠武韻

一掃燕塵。拚直抵黃龍小歇。看百戰中原震動。背嵬猛烈。拐子山摧。胡馬陣。孟婆風轉。盧龍月。歎遺民飛送上皇書。誰關切。繡旗字。絨

花雪。膚涅字。雕青滅。待燕雲唾手。金甌無缺。雀弋黏竿竿首肉。杯剗乞買顛閒血。奉南還二聖謁園陵。修宮闕。

其二

衝地金風。掃禁院繁華都歇。傷往事朱仙北望。浩歌激烈。老檜能搖南渡楫。敗荷空戀西湖月。聽天津橋上子規聲。聲淒切。冷山皓頭如雪。渡河澤。淚痕滅。歎英雄空老。寶刀欲缺。望裏黃龍虛痛飲。車前太乙休啼血。看秦城王氣暗錢唐。遮陵闕。

次文山和王昭儀韻

昭儀娉娥相顧。肯從容隨圓缺句。須於相顧處略讀斷。原是決絕語。不是商量語。文山惜之似誤。然文山所和二結句。又高出昭儀上。讀之悲感。敬步二闕。

曾侍昭陽。迴眸處六宮無色。驚鞞鼓漁陽塵起。瓊花離闕。行在猿啼

鈴斷續。深宮燕去風翻側。只錢唐早晚兩潮來。無休歇。天子氣。宮雲滅。天寶事。宮娥說。恨當時不飲。月氏王血。甯墜綠珠樓下井。休看青冢原頭月。願思歸望帝早南還。刀環缺。

其二

有客黃冠。請歸看江南山色。謝家燕烏衣春老。傍人宮闕。金縷堆鴉雲髻亂。玉容上馬花翹側。恨半閒蟋蟀費平章。秋聲歇。紫氣散。朱厓滅。臯亭路。和誰說。縱鮫人無淚。桃花成血。心逐銜蘆沙塞雁。夢回胡蝶宮牆月。歎妾身難補女媧天。東南缺。

憶舊。次子黃顯武韻。

又早東風。棠梨片亂紅堆雪。河橋路柔絲宛轉。爲人周折。畫角樓高。河鼓直。江關夜冷人聲絕。歎離人不是未曾經。難爲別。別時語。黃鸝歇。別時候。銀蟾缺。縱千條難繫。木蘭雙楫。尺素經年魚閒闊。孤燈

一點螢明滅。耐人愁。無奈杜鵑何。春三月。

雪梅香

吳山風雪。懷信弦。弟客五羊。

憶分手。清明三月禁煙中。悔別時容易。一帆飽送西風。千里相思榕  
葉綠。五羊殘照荔支紅。楓亭路。黎母山高。不到征鴻。潮陽鱷魚外。  
烽火連天。何處行蹤。縹緲煙波。吟成好句誰同。嶺上梅花已開遍。閨  
中錦字恨難通。吳山下。連牀夜雨。夢隔江楓。

尾犯

詠絡緯

孤枕覓秋聲。月掛牀頭。離思蕭索。斷續蟲吟。任金飈吹却。停夜織蛛  
絲當戶。坐支機。天河橫角。無端無緒。露緯風經。鬧殺閒綃幕。歎深  
閨久別。鬆盡銷項金絡。悔不當初。莫訂西窗約。百忙裏。泣盡迴文。報



相思終宵軋軋。騷人一笑。任他兒女雕籠索。

玉漏遲

詠促織

向空階絮語。不知何處。愁人偏切。金井銀牀。一夜碎啼明月。怪殺天涯蕩子。禁得過涼天時節。低嗚咽。初燈四起。曉鐘纔歇。可憐枕上關山。被片晌淒涼。驚回胡蝶。細雨孤衾。此情更和誰說。追憶金籠閒鬪。佯輸與一雙條脫。空悵別雕闌。桂華如雪。

六么令

和小晏春情

春心無鎖。飛夢出樓閣。東飛西飛難定。輕薄絮相學。悄被流鶯喚住。半晌無人覺。落花三匝。滿地殘英。細數花鬚幾纖掐。小樣鸞箋寫恨。鄭重邀郎答。幾度臨發重開。紙尾還添押。憶別櫻桃花下。春去無

多雲。流乾銀蠟。相思緘寄。認取啼綃舊衫角。

### 水調歌頭

寄懷信弦弟客婁東

黃浦一片月。照我最高樓。去年明月相送。記得是中秋。二十四番花信。三十六灣春色。何處踏花遊。勸汝一盃酒。莫向莫愁愁。杏花天。寒食後。曲闌頭。誰家紅袖吹笛。素手押簾鉤。寄語吳江雙鯉。可憶閨中年少。典盡鸚鵡裘。歸去且歸去。杜宇笑人留。

春日。飲朱氏大觀樓。

今古此春色。幾箇客登樓。把杯還問春色。畢竟爲誰留。歲歲燕來燕去。月月花開花謝。白盡少年頭。花下一壺酒。且莫替春愁。憑南望。山北向。海東流。樽前眼底。吳楚千里落雙眸。潮打越王臺下。雲散始皇祠上。豪傑已山邱。我醉與君別。相送木蘭舟。

齋閣看玉蘭花。

昨夜瑤臺雪。千里舞東風。喚取織綃神女。翦綵月明中。排列霓裳全隊。簇擁素娥十二。盡下廣寒宮。穠李伎無色。飛絮撲簾櫳。畫樓前。雕闌外。粉牆東。清暉一片。不許胡蝶攪丰容。記得玉峰舊侶。相約瓊花開日。羽袖訪山翁。笑我已華髮。尙復映花叢。

吳山懷古

吳越幾爭鬪。不改此江山。錢塘昔日西渡。風雪過江寒。回首宋家宮闕。試問萬松何處。荒草有無閒。落日牛羊道。虎跡自斑斑。興亡事。蘆葉岸。白鷗閒。英雄多少。衣錦大樹已摧殘。三折雲峯盡處。七里灘頭釣客。自在一漁竿。笑煞風波子。日日弄潮還。

鳳凰臺上憶吹簫

和漱玉詞

易惱鶻啼。無憑蝶夢。一時多上眉頭。訝歸來書信。啞謎藏鉤。半紙相思。賤牒。循環簿檢。勘無休。勾銷了。今春病害。又也今秋。驚秋多情輕薄。此處不留人。怕有人留。仗閨中明月。照到江樓。還恐山高月小。照不見兩處顰眸。凭闌外。千山萬山。砌殺離愁。

燭影搖紅

春閨。次子黃韻二首。

風軟游絲。繡衾無力支春暖。多愁不爲落花多。忒殺殘紅徧。且閉海棠深院。把十二屏山半掩。難銷顰黛。易減鉛華。桃花人面。悶擺簾鉤。一鉤新月弦初滿。春深尙道怯餘寒。雙頰垂紅斷。並宿紅襟小燕。怕空梁月斜夢遠。鏡潮鏡汐。三眠三起。香篝屢換。

其二

香篆文迴。博山雲瘦金猊燼。晨粧不喜上蘭翹。淡掃寒鴉鬢。愛好修

矚頻整。箇中人可憎難盡。倚闌心事。倦繡眉梢。隔窗人影。玉懶脂慵。春深不敢多臨鏡。因春銷瘦惜花殘。檢歷占花信。坐到燈昏月隱。不眠人熏籠猶凭。戍樓橫角。芳草天涯。茶蘼時令。

汶上感懷

南旺湖南。太山一帶青無了。須臾盡入碧霞中。惟有雲縹緲。南北遊人多少。斷送他青山易老。鮑魚車返。龍祖仙遊。馬肝人死。管葛山人。家居原近蓬萊島。誰教匹馬走天涯。行盡汶陽道。放眼乾坤都小。只煙波一雙白鳥。江天微雪。野店殘雞。關河將曉。

天香

詠桂花

羅袂餘涼。綺疏餞暖。金風謾謾簷背。白露橫空。月華當戶。忽憶美人千里。山河影外。橫一樹虬龍相倚。問取蟾宮消息。廣寒夜深如水。

龍涎暗飛金屑。一沾人伐毛洗髓。定有素娥下降。芳蕤竟體。高臥小山老矣。惜五嶺迢遙拔空起。遠道無因。共尋黃綺。

此  
页  
空  
白

茗齋詩餘卷二

漢宮春

吳山雪霽。用康伯可韻。

何處湖天。只茫茫雲海。冷迷凍鵲。琳宮環珮。風馬琤琤天樂。春回萬木。一枝枝瓊條。瑰萼。此處斷塵凡。不是飛仙也。翔寥廓。湖山笑人輕薄。恨瑤臺伴侶。負他舊約。藥珠托宿。倚徧織綃樓閣。江妃贈我玉芙蓉。曉寒零落。因風寄相思。尺素雙鯉銀鉤。搯却。

和伯旃客感

秋氣悲哉。漸西風落雁。朔管吹蘆。多少龍泉燕市。笳馬魚鳧。南柯蟻鬪。夢回時半枕胡蘆。淒涼煞暮雲宮樹。斜陽冉冉寒蕪。顛悴天涯。作客伴殘燈孤店。餘雪長途。腸斷天寒翠袖。幽夢熏鑪。故園何處。江天外煙月吳都。聽不到菱歌水調。清商子夜棲烏。



倦尋芳

本意。用王大祝韻。

花身影正。睡眼紅銷。徐起中書。雲亂屏山。猶戀雙鴛衾繡。閒殺東園  
秋千影。垂楊風逆鶯飛透。惜春殘。怕尋芳徑冷。杜鵑相候。幾多日  
朱銷粉倦。絃指生疎。冷落箏手。懶畫眉兒。不喜畫眉兒鬪。剛則雕籠  
啼一轉。遠山蹙過顰痕舊。甚情悰。把花枝。轉添人瘦。

詠燕。次子黃韻。

畫巢香乳。藻井泥融。梨花深院。到處雙飛。紅雨不教吹散。掠鏡頻窺  
釵鈿小。穿簾低入樓臺徧。是誰家。烏衣人物。依稀曾見。聽玉樹庭  
花歌斷。水榭磯寒。平蕪煙暖。金粉六朝。東去伯勞非遠。細雨斜飛金  
翦下。輕風巧避晴絲捲。乍歸來。午眠時。海棠春倦。

醉蓬萊

和屯田老人星見應制韻

宋仁宗禁中秋宴。太史奏老人星見。命詞臣爲樂章。屯田應制詞。漸亭臯葉下。帝覽詞。首漸字。天顏不怡。至宸遊鳳輦何處。又暗合御製眞宗輓詞。御容慘然。至太液波翻。帝曰。何不云波澄乎。擲之地。不復擢用。按屯田詞。於老人星見。並未一言形容。明主具眼。見斥。不特觸諱已也。爲改定一章。仍次其韻。

正銀河夜永。碧落秋高。天街澄霽。南極光輝。拂參旗雲氣。萬歲山開。長生殿啓。老人星照砌。喜動天顏。歡騰黃屋。玉繩映水。四海無塵。一人有慶。樂奏仙韶。花陰徐遞。試候江湖。有異人應瑞。鶴骨奇姿。龍輓短下。美童顏韶脆。璿璣不動。山河影靜。桂輪香細。

秋閨。次子黃韻。

見明河清淺。烏鵲驚枝。嫩涼庭榭。露禱雙星。冷紅銷虬炙。梧葉頻飛。  
半輪斜轉。掛雙鳴銀瓦。欲擊瑤笙。生疎纖指。沈吟花下。暗拭檀痕。  
閒思往事。共剔秋燈。一宵情話。恨殺荒雞。催紫騮早跨。三十六鱗。十  
三行字。雙鯉書空寫。小院流螢。照人獨自。空牀遙夜。

癸丑七夕。題醉仙圖。爲邱母壽。

正仙萸七展。靈鵲雙飛。婺星降夕。清露新桐。洗天河一碧。金鳳花明。  
玉船藕脆。佐壽觴浮白。香粉筵開。舞綵衣前。穿鍼樓側。何處丹青。  
貌出羣仙。鹿脯麀巴。洗酣倒劇。爲問茅容。可多儲胥炙。此日填門。幾  
何車馬。軋軋牛輓。鸚武樽中。玉山頽處。誰如此客。

聲聲慢

和易庵秋閨

自眠自起。自歎自嗟。自憐自笑。自戚。已自難捱。何況暗蛩聲息。一絲

兩絲氣力。怎覈能髻鬟梳急。不道已是秋深。看到菊花纔識。單枕  
被池重積。鎮日睡長把翠翹都摘。鏡裏容顏。能得幾時鬢黑。臨風暗  
彈素袖。又零星三滴二滴。箇情緒。問薄倖心上過得。

七夕病中

一痕秋碧。半簾湘文。印臂花影纖穠。燒藥紅兒。夜分頭觸屏風。曲闌  
干外私語。獨眠人只有愁儂。天如洗看匏媧左側。烏鵲橋東。懊惱  
人閒天上。只多情難懺。藕孔玲瓏。幾度暗銷衣骨。費盡鍼工。願繅乞  
巧蛛絲。喚玉清共擘輕容。醉擁著。睡鮫綃槐郡夢中。

暗香

和白石梅花

淒淒夜色。且醉扶紅袖。倚樓橫笛。喚起玉龍。斜月鱗鱗曉星摘。回首  
故人天際。欲書寄瑤華無筆。誰共我枕石山中。霜冷露盈席。南國。

音信寂。縱千里相思。方寸堆積。悲吟當泣。不是思君定誰憶。猶記一枝送影。香夢入羅浮空碧。柰可翠禽叫轉。不歸也得。

帝臺春

春恨。用南唐元宗韻。

花影脈脈。春愁黯無力。成陣亂紅。不管人愁。無風飛急。冷落秋千上已後。較愁似去年今日。問多情燕子剛來。天涯消息。無消息。歸未得。守月直到燈黑。儘夜夜朝朝淚痕多。準不過一江潮汐。人去今春已非舊。春去那人可如昔。便儂做東風。肯花枝憐惜。

長亭怨慢

別怨。和白石韻。

是何處流鶯低語。不道高樓。有人閒倚。飛絮漫天。馬蹄蹂碎暗塵裏。青山江尾。堆積到愁多處。山自不銷愁。何苦兩峰窩。雲斂碧聚。春

江非有淚。那只管流難住。縱饒是淚也。和雜楚天風雨。是不合獨自憑闌。見無限江山如此。取次若重來。無杜鵑時方許。

送別。次子黃韻。

行折柳灞橋西柱。芳草萋萋。雕鞍纔據。燕子剛來。忽忽共作河梁語。馬蹄雖住。先負離情東去。無計爲君留。不是不留人。春盡已暮。聽檀槽銀背。疊到渭城三句。野館濃花。空極望隴雲秦樹。知今夕旅夢誰邊。指一帶遠山多處。此地卽天涯。况又天涯前路。

八聲甘州

夏夜聞蛙。用青田韻。

青田詠蛙。小有思致。未極才情。結語灑灰。似燒琴煮鶴。因用其調。賦以見意。頗謂勝之。

聽池塘青草鬧。終宵亦何減。塤箎笑。巴童井底。禿廝紫色。駭帝園池。

只有憑車烏喙。啄矢沼吳時。偏愛他強聒。餘怒鳴悲。合向幽人林下。代篋絃絲竹。軋札呀呬。更談諧調笑。白出紫之詩。道先生家無伎。繼送歌兒一部。盡青衣。問誰到蝦蟆陵下。讀曲從師。

秋怨和柳五。

憶當年匹馬向潯陽。白雲渡河秋。正天橫霜雁。山明驛火。風入江樓。最是江聲送客。日夜豈曾休。不管歸期未。先自東流。回首鄉關千里。漸渚蘋汀鷺。殘照將收。任雲山留我。難爲鷓鴣留。想倚闌舊時人在。幾夢中隨我上孤舟。又誰道夢中人返。反爲伊愁。

孤鸞

本意

屏山舞雉。問寡鵠情悰。離鴻消息。日斷青霄。何事不如比翼。東風容易吹轉。不肯送天涯歸客。如此暗窗疎雨。可梨花禁得。縱梨花禁

得也誰惜。祇對影纔雙。除影只一。恨比空江水。能深幾多尺。誰道春光解恨。算只有斷腸春色。分付流鶯漫轉。夢回時剛則。

瑣窗寒

旅中對雪。次子黃韻。

羈棲櫪馬。凍咽荒雞。淒淒朔氣。千山路斷。似臥窮荒沙際。念空山白石孤煙。悵霜枕紅情雙繫。早驚寒鴉陣。戍旗殘角。征人將起。不是淹歸計。信一笠煙蓑。羊裘篷背。夢裏還家。屈戍銅環忘閉。悔別時容易天涯。拚今宵兩鬢同醉。任西風舞盡梨花。并作離人淚。

無悶

有憶

青瑣翠圍。綺窗朱榻。睡透花梢紅日。耐半臂奇溫。一身憐惜。料得憑闌凝盼。送木蘭槳破遙天碧。回眸處幾度斷收紅雨。遠山濃濕。悄



立。錦屏人聞歎息。銷受柳昏鶯軟。花煩蝶困。風纖燕側。一并情絲堆積。怕不是東風無氣力。吹不轉蕩子天涯。子規時節禁得。

催雪

本意

徑沒蒼苔。庭無積葉。盡作雲階月地。似天上飛瓊。下臨塵世。偏愛竹籬茅舍。有野鶴寒梅爲姬侍。江天淒緊。千山人絕。漁舟獨去。休去。且教住。倘沾酒得魚。同來索句。先翦碎詩鬪。滕王蝶翅。吟罷蝦鬚高捲。笑輕薄楊花無才思。謂新詞不減四愁。伸紙瓊瑤盈字。

換巢鸞鳳

七月初六日。詠牛女。

只隔今宵。悵銀河未沒。欲渡無橋。細風吹鵲尾。淡月上牛腰。初秋那更夜迢迢。則今已愁來宵那遭。離情久。怕說起好期將到。機絞。愁

未了。天津畔收拾牛衣早。河鼓頻催。錦梭方擲。打點相逢話稿。今夜今年恁多長。雙星雙盼偏難曉。天孫辛苦。明朝莫乞新巧。

東風第一枝

春雨

空館留寒。深閨冷夢。沈沈斷送春暖。暗銷花事紅稀。添濃柳條綠淺。殢人無力。低不起草柔風軟。幸海棠繡幕深遮。不透紫衣輕燕。疎刺刺紙撈窗眼。撲簌簌水紋簾面。關情何處偏多。門掩黃昏小院。羅巾濕盡。細細織春愁如線。再相逢百舌喉乾。約到黃梅時見。

念奴嬌

和東坡赤壁韻二首。

周郎年少。想當日眼底曹劉何物。萬古長江流不住。吞盡東南半壁。鸚鵡洲寒。洞庭葉脫。正好鱸如雪。得魚沽酒。臨江共弔奇傑。空留

無主江山。多情沙草。依舊東風發。吳楚英雄流水去。漁火半明半滅。  
黃石磯頭。白蘋波裏。折戟生苔髮。南飛烏鵲。曾噪魏室明月。

其二

江山千古。渾不改一派煙波雲物。白浪黏天天接水。冷似畫圖粉壁。  
幾徧旌旗。數行鷗鷺。眼破蘆花雪。漁家守網。閒話南國人傑。笑殺  
銅雀癡翁。小喬嬌婿。相顧雄心發。野草紅霞連夜火。儘付寒濤蕪滅。  
金馬閒人。醉攜翠袖。戲摘山僧髮。浩歌長嘯。猶憶壬戌秋月。

長歌四闕。次信弦韻。

長歌擊石。看風翻花笑。竹搖金碎。飽食拋書眠跛脚。脫鞵不煩廷尉。  
蠶老花香。燕來筍出。遇此能無醉。杭田初種。平生願可能遂。逢場  
謔月嘲花。拈毫信手。滾滾閱而肆。苦瓠爲羹菱作飯。絕勝紅銷虬鱸。  
磨蝎填宮。貪狼照命。運退逢輿鬼。榮枯萬事。大槐根轟騰睡。

二

何須髮指。令酒徒髮指。羈孤心碎。眼底須眉少男子。半是寺人中尉。  
捫舌空存。折腰可耐。去去吾甯醉。芟荷可製。遂初賦。今初遂。已知  
骨相無侯。升沈久定。莫詣君平肆。蔬食清齋魚腊斷。懶著書成斫鱸。  
烏有身名。諾臯身世。姑妄空談鬼。不如乳鴨。向池塘綠陰睡。

三

滑稽狎世。笑殿中檻折。正言衣碎。提酒旗亭歌絕句。壓倒龍標仙尉。  
入覲釀王。出藩歡伯。帝有鈞天醉。糟邱可老。菟裘計豈難遂。焉能  
逐取乞兒。侯門獻笑。呈技如凶肆。三泖四鰓魚恣噉。莫管胸留生鱠。  
忽憶故人。瘴煙徭穴。作吏如猫鬼。清樽且酌。照海棠夜深睡。

四

酒酣起舞。驚山香亂落。浮萍吹碎。秉燭清遊長達曙。那顧夜行亭尉。

北客休談。西湖雖好。萬事無過醉。羸羊世網。不能退焉能遂。身輕却喜無官。歌呼蒲博。貧賤真堪肆。濠上會心儵卽我。夢破魚頭人鱠。畜隻鷓鴣。黃魚時節。頓頓殮烏鬼。飽眠一寤。不睡龍缸禁睡。

解語花

無題

鴉頭婢散。鳳背釵橫。紅蠟花低亞。絳幃開也。銀燈背。羞澀羅衣未解。輕顰可畫。怕瘦損腰肢難把。不分明。花氣參差。嬌輔清於麝。銷受錦衾良夜。憶梅花紙帳。單枕巫峽。相逢未嫁。驕夫婿。不是援琴司馬。春宵一霎。約略記雨纔雲乍。驚畫眉紅日花梢。喚美人醒罷。

美人捧茶和弁州韻。

南冷月小。北峒山高。甲坼驚雷細。翠鐙影入雙蛾綠。皓腕碧旗初試。乳珠雪蕊。三沸盡笙簫如縷。要玉人仙掌奇擎。色授嬌波意。小顛

巍我鬢髻。裹春尖籠袖。疼護柔指。碧甌青脆。鸚哥喚銷渴。文園曾起。  
鴉頭美婢。也不染粉脂穠麗。帶松風吸傍花枝。俊殺瓊漿味。

玲瓏四犯

招夢。寄調信弦。

春夜招子玉飲花下。訊及信弦茸城旅况。歸思淒其。恨稀春  
夢。夫二元景文園銷渴。方苦夢多。信弦旅館單棲。反悔夢少。概  
括其意。成玲瓏四犯二闋。寄調信弦。并嘲元景。寄示墨樵渭  
臣。以發客邸一笑。

八尺單衾。恨好夢多般。藏貯的少。睡後淒涼。生怕枕兒知道。空館也  
忒欺人。死不放高唐人到。恐陽臺雲雨勾管。不容出巫山廟。月痕  
寒透孤眠印。只熈娥影來偎抱。睡鄉冷逼情根熱。填殺春風竅。應悔  
別淚那宵。輕發落櫻桃卻要。怕閒花反目。偷央蝴蝶。註銷一覺。

卻夢。嘲元景。仍用前韻。

央及鶯花。暫雨約雲期。告假些少。夢裏情人。走熟睡鄉官道。應是發配花神。夜夜向藍橋投到。問業緣銷限何日。賽徧妬津祆廟。離魂倩女。雙勾引。向虛空倒郎懷抱。春光漏洩。歡悰竭。願三生無竅。賭呪紙帳獨眠。朦朧裏此人偏要。拚海枯石爛。割恩蠶室。一眠一覺。

自和招夢韻。

誰箇卿卿。心坎裏纏綿。姿豔偏少。甚處相親。夢亦無緣。難道幾度冒雨巫峰。獨宋玉唱名不到。遮莫被巫陽奏貶。提舉有鰥孤廟。朦朧想到和伊睡。卻是竹夫人橫抱。孤眠真箇何曾慣。枉風情多竅。空隨蝴蝶尋他。也難把鏡中花要。須索跟來夢。人兒暫借。迷樓睡覺。

自和卻夢韻。

上覆紅鸞。莫暗逗風情。狐媚三少。燕約鶯期。鑽穴隙南柯道。告免雲

雨差除。又掌寢牌符提到。願長作不眠魚目。筦鑰把梁妻廟。溢情  
波驚精香散。猶軟薰轉身迴抱。虛空吃吃歡持足。恨情花開竅。何處  
相尋素女。參握固牝門元要。任思香媚寢。蝶交蜂退。春眠不覺。

桂枝香

春望

年年風雨。偏今日今年。較愁容易。屈指清明近也。杏花還未。春光未  
老空銷瘦。斷送人遠山橫翠。箇中情事。不教愁殺。除非沈醉。憶當  
日樓頭舊侶。想人面依然。桃花何處。往事銷魂。費盡斷腸詩句。燈前  
細認人何似。怕舊恨重新提起。佳人相勸。落花簌簌。搵君清淚。

金陵懷古。用半山韻。

春燕滿目。問何處三分。公瑾魯肅。惟見長磯碧鎖。落霞紅簇。鷓鴣飛  
上南朝殿。看三山白雲晴矗。畫樓天角。錦帆江尾。雨花風足。柳陰



外雕鞍共逐。問吳宮晉寢。碑斷難續。未到景陽。多少粉殘衣辱。幾番  
興廢荒臺院。隨燒痕一夜都綠。多情遊女。庭花纔唱。顰眉先曲。

木蘭花慢

新月

喚雙鬟低問。是初月。是簾鉤。正犀梳斜吐。菱花半掩。銀甲微攏。搔頭。  
晚粧拜起。恰下階私禱。見人羞。三點香燒心字。一痕側近牽牛。登  
樓。纖招照莖。陡的上眉兜。憶相期小盡。刀環破鏡。天際孤舟。還愁。  
團圓不設。把分鈿剖玦。筆兒勾。弓樣鞦韆幫瘦減。彎彎寄與風流。

宴清都

和信弦。詠螢火。

暝色黃昏坐。閒庭榭誰照寂寥的我。花梢露滴。暗窗燈燼。空階流火。  
深深小院無人。隱約見門橫金鎖。又誰家連夜催花。隨風亂點紅雨。

幾迴乍去還來。半明不滅。將飛仍墮。暗窺綃幕。未解羅衣。有人獨臥。輕紈小扇拋卻。數徧牽牛星幾箇。呼侍兒半捲晶簾。放他低度。

信弦螢火蓮花二詞。極爲玩亭使君所賞。歎歸以示余。亦賦二首。終不能勝之。

### 月當廳

#### 燈期阻雨。豔情。

燈期燈市無燈。夜淒淒花墜。蘭燼銀莖。月黑星橋。不聞馬滑人聲。故使良宵冷落。想上元青鳥忒忘情。渾休管。鴉頭半斲。魚目雙冥。紅橋斷盡揚州路。廣寒人巫山左側消停。壬紅澣夕。連宵惱殺卿卿。霧鬢風鬟花有信。教雨工偏住山棚。生怕恁。貪燈謎月。勒住春晴。

#### 燈前雨止。晨起。再疊前韻。

攜燈將踏春燈。夜舒荷幺紅。燭冷雙莖。月暈繩河。夜烏稍帶歡聲。多謝水妃歸去。半雲遮花掩弄春情。輕籠罩。麗譙隱隱。參足冥冥。燈

前盡是看花侶。繡障泥流蘇珂穗休停。粉圍約伴。花孃月姊芳卿。腰鼓十番金絡索。問綺羅何處花棚。低相謔。昨留歡雨。今爲儂晴。

元夕大雨。三疊前韻。

鰲峰何處張燈。濯龍池撲翻。露掌金莖。鏗鏘水樂。喧填鐵馬無聲。欲倩行歌穠李。恐淋鈴纔唱已關情。黃昏後。燈沈花重。蠟睡煙冥。挑燈共作愁霖賦。落簷花筆花兩未曾停。天街如洗。金貂閒殺公卿。金門朱門偏冒雨。儘碧油重幙朱棚。珠簾外。千條絳炬。蜃市烘晴。

上元既望。雨稍止。四疊前韻。

燈辰可耐孤燈。捧瓊枝瑤枝。瑩奪荷莖。鵝笙對炙。輕簧送媚遲聲。奈可良宵二八。比盈盈十五更。牽情難禁架。沈香火底。睡玉沈冥。行人來收舊雨。只今宵燈前好夢調停。鬧燈鮑老。不煩雙漸蘇卿。十樓臺寒不入。貯月輪花滾毬棚。渾忘卻。冰簾珠箔。全未曾晴。

花犯

立夏詠梅子。用清真梅花韻。

亞枝低。纍纍掛綠。秀才賣風味。紺珠勻綴。憶嚼徵含宮。齟齬妍麗。佳  
人手摘簷牙倚。吞酸私自喜。記前月紅潮初盡。香篝曾共被。心中  
難拋撇仁兒。春山皺。蛰得和愁憔悴。還可惜。雙頭打。流鶯同墜。難甦  
醒日長人困。剛脆滴櫻桃濃睡裏。巧一陣棟花風過。吹芳魂似水。

拜星月慢

立夏

燕子巢成。棟花風過。鷓鴣送春去罷。何處春歸。問新來初夏。小庭院。  
到處陰陰嫩綠。襯貼茶蘼低架。摺疊春衫。展生綃裙衩。北源茶寄  
到山僧舍。香篝火雪帶松濤瀉。鬧殺兒女嬌嬰。笑爭分梅蔗。只佳人  
筍試春尖。乍含挑小色。溜朱櫻罅。聽西園惜別殘鶯。惱薔薇欲謝。

瑤花

詠雪

先春冰散。入暝花明。沒檐牙高啄。籬梢庭卉。折幾枝都似梳翎凍鶴。  
玉人何處。正暖炙鴉笙小閣。倚獸鑪纖指頰溫。字澀紅牙新學。

珠簾十二重遮。想此處清寒。不上梅萼。金樽翠袖。生俊煞。呵筆彩毫  
相角。苦吟句就。憶驢背舊遊如昨。較淺斟低唱。今宵如此。風情不惡。

畫錦堂

爲信弦壽卜太夫人

悅掛弧南。護妍堂北。我愛夏日偏長。教子薄他卜式。賜爵爲郎。絳紗  
帷中經自授。青綾障外客誰方。慈恩寺。第十九人。題名已報高堂。  
尋紫芝角里。爲阿母三千桃實。稱觴愧我東南留滯。采藥吳閭。道逢  
靈烏麻姑。使寄書瑤島白雲鄉。神仙宅。且再人間游戲。碧海扶桑。

安公子

題余氏女子繡洛神圖。和信弦弟同程邨、阮亭、諸公。

清髮吳綾軟。非煙非霧神光閃。繡虎情絲重。吐出凌波人面。微步盈盈。翠羽明如翦。遙思想。描影菱花展。怕前身粉本。儂比處。妃近遠。

可待丹青染。生塵羅襪香沾腕。千古才人。悔不倩鍼神寫怨。銅雀漳

河。遺枕同悲惋。十三行萬縷柔腸轉。付青衣紅線。補入填詞絃管。

冷朝

陽送紅線詩。有洛妃乘霧句。

雨淋鈴

燕山七夕。

燕山秋到。御溝寒雨。木葉微脫。離情自勸孤影。梧桐有滴。簾鉤無月。共道雙星此夕。正乞巧時節。卻惹起。撩亂閒愁。記得凭肩。翹離別。丙魚乙燕音塵絕。倩牛郎欲借天津楫。知道西樓小婦。顛倒穿鍼。嗚

咽。拚得孤眠。夢裏人歸。枕中胡蝶。又點破禁裏疎鐘。不放關河越。

眉嫵

詠美人畫眉。用白石韻。

把湘簾高捲。日上菱花。紅入綺窗眼。怕暗塵凝匣。羅衣拂。澄河匹練斜展。遠山近遠。在箇中酌量深淺。霎時裏。鷓鴣能傳怨。兩峰翠微斂。流眄。可憎人面。愛鏡晴山笑。鏡潮雲變。畫影分嗔喜。宜人處。黛痕無限。繾綣。春愁一點。寫不成九曲湘轉。還留取斷煙一抹待郎染。

水龍吟

道中見楊花。和東坡韻。

東坡道是非花。尋思好句從空墜。幾家閨閣。巧將比擬。逞他才思。撲蝶吹開。粉牆飛出。畫樓還閉。似春愁散漫。無情無緒。鬢鬢三眠三起。縱使春風不管也。難教舊條仍綴。怪伊輕薄。閃人拋躲。揉人心碎。

莫道風流。有時飄泊。浮萍隨水。勸惜春公子。夜遊秉燭。多收紅淚。

秦谿弔古

東南日夜波濤。恨填海祖龍不了。英雄已矣。虞兮可柰。吳其爲沼。無限興亡。水犀星散。鳴夷歸早。試憑高千里。越山數點。時出沒。隨鷗鳥。滿目山河如此。止潮打空城古道。江南江北。舊時燕去。故宮人老。細數落花。亂飄飛絮。暗傷懷抱。且歸來收拾漁竿。扶醉去眠芳草。

看正仲園中杏花。用東坡楊花韻。

小庭深掩重門。正玉笛樓頭吹墜。一枝嬌豔。如啼欲笑。非顰多思。怪是春來。玉容人倦。繡帷深閉。把珠簾乍捲。欲尋新恨。嬌困乍扶慵起。牆外酒旗斜矗。望別路去魂牽綴。閒愁萬縷。游絲惹著。鶯聲聒碎。朱粉香勻。淡羅衫瘦。柔情如水。只殘春幾點。非關風雨。難銷紅淚。

西湖春暮。次子黃韻。



花飛時節飛花。飛來飛去春無隔。斷腸天氣。增人懊惋。水光山色。拾翠誰邊。約略花閒。似曾相識。奈催歸杜宇。不容春住。傷心煞。傷春客。細犬秦樓繡陌。更阿誰月明吹笛。流鶯已老。六橋吹絮。粉痕山積。嬌馬馱愁。畫船繫恨。西冷西壁。有知情伴侶。多情小小。輕顰凝碧。

小樓連苑

食新粟作

秋園白露初肥。家家拾紫登山麓。金飈小罇。吳霜乍點。嫩黃纔足。未出瑤房。暗驚纖手。顰眉刺促。喜合歡腰細。中微束。種鴛鴦比肩佳目。作意春尖笑剝。褪中衣軟溫澀縮。漫投歡袖。可堪君口。情恬意熟。度脆飴脣。回甘犀齒。秋魁冠玉。恥雕盤薦飾。紅箋私裏。寄絨重複。

氏州第一

和柳耆卿秋思

紅樹高樓。黃葉古渡。遙天一抹山小。斷雁行低。驚鴉陣破。吹落秋聲  
縹緲。只柳梢殘月。猶把孤眠人照。螢背銀缸。蛩邊羅幙。暗催人老。  
應是離多歡會少。只無奈羈情縈繞。枕上天涯。關河千里。屈曲屏山  
繞。爭知今宵夢裏。相看處挑燈欲笑。是否巫山。是巫山楚天已曉。

瑞雪濃慢

人日。調閨人。

玉蛾翦勝。金蟲滴翠。鴉鬢柏枝增媚。春衣驚怯。瑤粟凝寒。紅綿添箇  
半臂。今年此日。水仙將謝。紅梅猶未。問侍兒檢樓羅新歷。花風已幾。  
上弦頭。殘臘尾。算佳辰爲箇人兒至。花前雪豔。雁後春愁。惱亂掃  
眉才思。額粧且住。護春山遠條風避。安排眉豔加翠。貂鈿潭仔細。

霓裳中序第一

感夢

斷魂未銷得。又見當時舊春色。人靜後月移花直。掩複帳流蘇。重門  
屈戍。珠光玉汁。暈熒熒清淚凝臆。偏惆悵。人閒往事。今夕是何夕。  
頃刻。雨蹤雲跡。杳冥濛蓬山千尺。追思古懽疇昔。憶牛女臨河。鴛湖  
共鷁。餘香冷瑤席。縷金暗蝶裙灰積。挑燈起。紙窗楞下。幾點亂螢黑。  
齊天樂

壽卜太夫人

北堂高敞南薰入。日高畫簾風透。綵簇官花。金泥報帖。新整烏衣門  
舊。機中手授。喜三策成名。萬言初奏。微笑慈顏。臨風爲舉一杯酒。  
陳情書上也未。玉鞭銀勒。幾日綵衣歸繡。上客千金。登堂百拜。劉薦  
故人來否。君恩高厚。莫爲我倚閭。便圖錦畫。留祝三宮。太皇千萬壽。

綺羅香

鴛湖舊遊題壁。用史邦卿韻。

憶昔尋春。美人未起。綺戶曉簾如暮。花困香橫。餘裊水沈猶住。翠被  
斂雲出巫山。犀梳吐月生湘浦。好菱花出落風流。蜂窺蝶引已盈路。  
十年萍梗飄泊。只柴門深鎖。小舟橫渡。銷瘦嬋娟。想似霜濃菊廕。  
西風翦窗外疎桐。恰墜題斷腸詩處。庭閣悄鎖日無人。畫眉隣巷語。  
瀟湘逢故人慢

懷黃浦舊遊

舊遊黃浦。憶霜蟹橫秋。江豚吹霧。一棹蘆花雨。恰重九登高。上洋官  
署。丹鳳城樓。隱隱見海濤吹鷺。閃驚沙一夜胡笳。烽火斷雲閒路。  
九峰青。低可數。見海市依然。栽花人去。濁浪黏天舞。感故國飄零。故  
人黃土。墜淚祠前。尙填咽神燈巫鼓。二十年無限興亡。只有寒潮如  
故。

題余氏女子繡高唐神女圖。遙和程邨、阮亭、諸公。

朝雲何處。從黛裏九疑。裙端湘水。飛下岷峨路。想十二峰頭。煙絲霧縷。繚繞君王。略迴避細腰宮女。暗追尋帝子行蹤。三峽碧空中住。

山藹蒼蒼欲暮。奈花落黃陵。如花人去。腸斷高唐賦。笑宋玉情多。楚襄夢錯。鬢髮寒憊。癡絕到繡牀燈灺。倩才人雲雨清詞。重向巫山顯

過。神女賦。燁兮如花。

春從天上來

詠鞦韆

一捻生春。便口角流涎。惱亂閒情。奇擎掌上。軟玉偏溫。莫愁量淺難勝。恰弓弓窄窄。掬不滿眼底盈盈。矚才郎。儘鳳尖啞。休流車茵。依稀青樓錦被。幾含笑相鉤。低語曾認。未倒玉山。且依金谷。頻吸舌上蓮生。任紉彈餘瀝。端詳視可濕香塵。漫留髡。恐暗中墜鳥。微減三分。

花心動

花燭詞。爲朱生洲士。

畫扇徐開。問多才。催粧麗詞曾畢。頻整雀釵。小顛花冠。作意綵輿遲出。羞蛾偷注。微波綠。難銷受暗中春色。帶人處。纖彎半掐。輕那無力。此夜相逢如客。儘搏揜今宵。雙身成一。低躲繡衾。代解羅襦。急性才郎真忒。玉鉤響。定燈花動。溫存煞。翠紅嬌滴。恨正好春眠。養孃將息。

永遇樂

和稼軒北固亭懷古

吳楚東南。長江萬里。人傑何處。鐵甕周遭。金焦相向。浪打空城去。雲颿沙鳥。往來無定。不爲遊人吹住。孫劉事。蒼苔蕪沒。獨留狼石如虎。山川猶昔。中原板蕩。腸斷蕭孃一顧。幾度春風。杜鵑零落。瘞鶴亭

西路英雄已矣。無情潮水。日夜江聲鼉鼓。憑兒戲蠻童鬪草。寄奴勝否。

折紅梅

本意。用宋人韻。

問羅浮千里夢中。盤盡瘦筇幾節。黃昏後分明玉洞谿頭。碧桃先發。朱衣素質。自是神仙風格。丹臺石室不到紅塵。有天上飛瓊。攜來絳雪。歲華空閱。聽羌笛樓頭。頻吹離別。一夜飄霜零亂。吹落燕支山月。羈愁漫說。橫參外翠禽啼咽。醉來莫倚赤玉欄干。恐狂歌一曲。珊瑚敲折。

西河

金陵懷古。次美成韻。

龍虎地。繁華六代猶記。紅衣落盡。祇洲前一雙鷺起。秦淮日夜向東

流。澄江如練無際。白門外。枯杙倚。樓船朽。櫂難繫。石頭城壞。有燕子銜泥故壘。倡家猶唱後庭花。清商子夜流水。賣花聲過春滿市。鬧紅樓煙月千里。春色豈關人世。任野棠無主。流鶯成對。銜入臨春故宮裏。

一萼紅

詠睡鞦和信弦。

玉鬢彎訝非花非月。偏入綺羅叢。莫道無香。自然有迹。勾人不露行蹤。最疼惜盈盈掌上。唾春尖小印齒痕鬆。雲起雙飛。雨餘並宿。夜夜相逢。幫襯思香媚寢。怕夜舒新展。點旆驚紅。帶孔頻移。被池緊扣。夢迴踏徧巫峰。追思憶腳蹤心事。那回好煞不言中。銷得九成帳底。一捻春風。

信弦詞已云絕工。然雲起雨餘二語恐溫李秦黃亦難更爲措手矣。



望湘人

詠張遠寫生卉物窗

看輕籠薄霧。濃胃重陰。畫簾高下婀娜。姹紫晴烘。妖紅深染。羞殺東君低躲。亡賴游蜂。輕狂粉蝶。謂他真箇。怪今年兩度韶光。風雨花朝重做。莫傍美人低坐。怕花容人面。難分你我。照影問張郎。多管畫眉筆錯。封姨莫妬。愛他百子。新納石家阿醋。更將取繡幙重遮。怕損落花風大。

金陵懷古。次子黃韻。

望秦淮渡口。煙樹茫茫。惆悵可知何故。淚濕紅裳。暗銷翠袖。多少菱花貴主。社鼓神鴉。寄奴荒草。昔人雄據。儘長江日夜東流。浪打汀蘆萍絮。哀怨啼烏相訴。見金虎西來。羊車南渡。只湖上莫愁。未作填官人數。舊時月色淒涼。曾照當日。凭欄干處。算多情只有烏衣。尚復

春來秋去。

望海潮

和屯田錢唐懷古韻

川原衣錦。樓臺錯繡。英雄耗盡豪華。潮打空城。射潮人去。興衰都付  
漁家。吳越一谿沙。恨越江吳地。咫尺天涯。半壁江山。半閒亭榭小窮  
奢。佳人南國偏佳。只西陵柏下。千古名花。隄雪流鉛。路桃獻笑。六  
橋鬧殺羣娃。淥水按紅牙。幸荷蕖風細。吹揭朝霞。拾翠人多。零香剩  
粉向誰誇。

題余氏女子繡龍女傳書圖。遙和程邨、阮亭、諸公。

涇陽雲散。洞庭波遠。淒其霧鬢風鬟。客似初平。兒非雪窖。雨工毛髮  
生寒。鮫淚濕輕紈。盼藥宮綃闕。歸去應難。尺素千行。憑君作鯉寄書  
還。似聞嬌泣迴鸞。矢報恩徑寸。愁緒無端。襜結指湘山。柳色依然。

綵舟縹緲人間。萬歲爲歡。有深閨偷傳錦字。刺上冰蠶。誰護驪珠。璇璣小樣句迴環。

一寸金

詠蓮花和信弦

何處飛仙。羅袂從無點塵沓。似朱顏二八。臨風雙笑。良宵三五。銀河獨坐。愁到江南路。唱偏了菱歌千度。休教見楚豔吳娃。應是紅衣有人妬。恨若無情。嬌來欲語。啼珠寄綉府。恐江干製芰。莖還多刺。水中結屋。荷難爲柱。費盡騷人詠。多半似六郎貌取。問阿誰出水天然。秀奪池塘句。

詠十姊妹花追和幼玉先從姑呈玉映女兄作

叔大父君山先生二女。長季琬。字玉映。次季炎。字幼玉。皆能詩。幼玉姑病革。語其子朱昂曰。古者摠言不出於外。况詩詞

流播乎。吾死後。取稿悉焚之。朱昂不忍。稍收遺佚。十僅二三。偶發故笥。得此篇。敬和而傳之。令詞家編之形管焉。

附詞。季炎。詠十姊妹花。寓一寸金。呈玉映女兄。繡襦銀屏。生小連枝。開取次。笑昭陽合德。空傳雙絕。二喬傾國。翰他未字。林下標風致。論才貌。誰甘第二。閨中費幾許。評章。連譜添枝。上花史。只數排行。難分姊妹。紅顏總相似。便成都眉樣。粧成一色。回心詞豔。香分何處。惱亂探花史。原只合花閒序齒。殊非是。十八封姨。花信知同乳。

合藥分英。不與羣芳爭品價。縱彭門貴種。非矜富麗。朱門妙質。自然幽雅。二美誰高下。算閨閣陽春和寡。錦屏中花萼相輝。道韞才名冠諸謝。不藉花師。難呼月姊。深閨二難也。似成行五五。豔歌羅列。當花葉葉。嬌嬈妍冶。黃絹成佳話。流遺墨銅臺雀瓦。把花牋重到花前。不見看花者。

疎影

和白石詠梅

月痕如日。送黃昏暝色。翠羽雙宿。耿耿橫參。清切隣家。飛霜暗上絲竹。美人林下驚相遇。想身在孤山亭北。卻夜深白鶴歸來。雪滿山中黃獨。爲訪冰臺故侶。依稀曾記得。名字萼綠。謫下瑤池。暫住人間。流水疎籬茅屋。儘教歷盡荒寒徑。不肯到春風杜曲。問幾枝臨水。欹斜。紙帳已橫前幅。

沁園春

和文山題雙廟韻

自古誰無。視死如歸。死亦何妨。恨洗兒妃子。暗馳駝足。白頭太上。驚走羊腸。老將潼關。詞臣凝碧。不及睢陽雀鼠香。忠肝照。似山河桂影。不缺吳剛。淒涼宗社興亡。又經歷金元幾戰場。歎徘徊汴水。空留雙廟。從容柴市。尙有餘芳。燕子蘆花。水萍風絮。何處乾坤著首陽。從張許。無煩炎午。委婉商量。

初度自嘲

甚矣吾衰。歸去來兮。亦已焉哉。笑山中甲子。年忘歷日。子惟乙卯。謫  
豈仙才。白髮生顛。青衫脫手。卿相何如兩芋魁。難銷受。藥鑪香燼。書  
帳燈煤。乾坤都付猜枚。願傾取滄溟作酒杯。比米家顛老。并無丈  
石。孤山處士。更少妻梅。兩隻芒屨。萬年藤杖。報道桃源花又開。身名  
事。付南柯駙馬。東閣官槐。

其二

去日苦多。來日幾何。亦何爲哉。但陶潛漉外。不愁無酒。江淹筆下。已  
恨無才。且盡尊前。休論身後。醉倒橫參斗轉魁。燈花好。故人至也。莫  
翦青煤。曹劉班馬鄒枚。總不及先生此一杯。縱封侯萬里。天山青  
海。逃禪半偈。雪竇黃梅。買个扁舟。五湖歸去。相約漁船開未開。還相  
訪。冬青烈士。俠客鉗槐。

鴛湖旅寓調朱大所歡。

憶昔當壚二十年前。十五盈盈。自劉郎一去。已非前度。徐孺雖老。尙復多情。秋水波平。遠山黛皺。舊侶相看。總目成。提壺就。見落英滿砌。菊嫵霜橫。低聲萬福。卿卿問何事。腰支太瘦生。想文園銷渴。偏思露掌。文君未寡。早有山盟。邨釀娛人。野花送客。犢鼻臨風。滌未曾。羅裙濕。正鴛鴦湖上。舊雨新晴。

送友北上

上馬一杯。馬上相看。欲去仍留。問長安花信。明春禁院。長途旅夢。殘月蘆溝。五色雲邊。萬言草就。喜氣天顏。動袞旒。臚傳早。看昭容紫袖。玉捲簾鉤。泥金他日。歸舟繫野老。柴門水盡頭。正山中高枕。深埋人跡。花前飛蓋。曲礙行輶。倒著荷衣。斜支席帽。罄折生疎索。罷休。如相訪。莫松閒呵殿。爲減三騶。

壽魏里姻家錢母袁太夫人六十

南國天人。府甲烏衣。族表袁羊。佐伏波銅柱。曾平徵側。雲臺勳烈。不藉椒房。錦織西旋。夜郎南返。手抱雙麟。下點蒼。門庭舊。喜忠留箕尾。才育辛陽。幾年清淺扶桑。早碧海紅塵。取次揚。羨荀里門高。有龍下食。茅容客貴。爲黍登堂。河女靈瓜。華峰船藕。阿母長持萬歲觴。兒曹事。繼西臺持鉞。東閣平章。

過秦樓

弔青樓次子黃韻

行雨人歸。綵雲飛去。留得乘鸞畫扇。塵生錦幔。絃澀銀箏。從此尋春路斷。可堪人迹紅窗。印砌香鉤。綠苔新換。憶仙舟繡被。綠楊啼鴉。避人私纜。儘生受玉釀花濃。翠銷紅滴。勾盡相思。哨徧衣韝。流處倦枕醒時。難數斷腸悲怨。相逢未必他生。祝願牽牛。懺情迴雁。縱重來



再倚玉簫。可認當年歌院。

子黃顯武二子。才情殆難伯仲。子黃情深婉麗。可稱詞家當行。  
 惟醉蓬萊一闕。叶炙字未妥。徧考諸書。惟膾炙字作此音。其餘  
 皆叶十一陌韻。亦尺璧之一類也。顯武和韻非不佳。但情景往  
 往雷同。原唱。惟水龍吟一闕。幾奪幟。滿江紅已不免。一轍燭影  
 搖紅之衾。寒長凭。凭字勉強湊韻。其不念人腸斷。青山驚換。皆  
 不離原唱。潘令荀令尤為合掌。倦尋芳起二句不佳。醉蓬萊彩  
 鸞同跨。亦遂句同。長亭過秦樓。綠楊會。馬不相思。無據同。殘照隱一  
 聯。終是湊句。望湘人一闕。離愁無據。與相思無據。同。殘照隱一  
 飛絮春絮。沾帶不能超脫。重意大。都無相。何處歸去。五韻難據。  
 仍之不變。何取乎叶韻也。可。不揣效。武。自謂庶幾奪胎。水  
 龍吟之起結。滿江紅之兩結。燭影搖紅之落句。望湘人之故主  
 據渡數處。諸韻脚。皆變化了無痕迹。紅之落句。望湘人之故主  
 不為原韻束縛。始佳。如東坡和章質夫水龍吟。須氣逸其上。始  
 為妙手。貽于彭孫貽。其何如。

摸魚兒

寄信弦弟。客茸城。

記前秋鴛鴦湖上。短篷搖曳明月。西風連夜催人發。不管情悰難別。

人去也。早又是新秋。落葉涼時節。海天那缺。那堆裏雲山。茸城一點。空水互明滅。不堪說。兩字功名周折。空勞枕上胡蝶。還家蕩子空閨妾。驚散了冬檐鐵。休悲咽。儘眼底輪贏未了殘碁劫。松江如雪。知不爲鱸魚。臨流把酒。買棹弔黃歇。

賀新郎

嘲少成姪。墜馬傷眉鼻。

風暖海天直。正長隄平沙藉草。軟塵鋪陌。蹀躞玉驄驕不住。倒墜踏花狂客。驚墜鳥遺簪狼籍。可是惜春殘杜宇。隨落英點破啼紅濕。血濡縷。眉閒尺。遠山驚蹙文君碧。笑檀郎學人墜馬。髻偏粧額。敲斷珊瑚鐵如意。細詠洛生捉鼻。非睡漢華山蹄失。定是眼花眠賀監。似乘船醉落天街側。鷓鴣道。行不得。

感時。用稼軒韻。

孤憤韓非說。恨茫茫乾坤無地。避秦仇葛。江左夷吾誰底是。楊白花  
飛成雪。笑久矣吾多星髮。咫尺狒狸飲江水。猶尋常乳燕巢梁月。彈  
不盡。雍門瑟。金樽到手休輕別。望滹沱朔風不起。河冰難合。移得  
冬青三兩樹。誰辨六陵餘骨。且莫道先生癡絕。燒取咸陽三月火。也  
難銷方寸肝腸鐵。髮上指。眦雙裂。

再和前韻

時事尊新說。鄙孔尼春秋朝報。虎牢長葛。博帶寬衣麥口論。又向風  
痺搔雪。弄宇宙倒懸如髮。莫嘔是兒肝五色。且聽他彼婦韶三月。秦  
王缶。趙女瑟。送春不忍春將別。有所思美人未至。碧雲欲合。屈指  
平生無限恨。何止鮭魚多骨。只贏得連癡三絕。老筆縱鐔金石響。知  
乃公胸有裝賓鐵。池一躍。明鏡裂。

三和前韻

說法本無說。任逍遙。此身喫著。青精黃葛。飽後芒屨拖兩隻。閒看海潮如雪。直望到天池窮髮。歸把亂書隨意讀。渾相忘某傳何年月。拋書起。風瑟瑟。老彭殤子誰差別。且瞢騰邯鄲一枕。眼皮長合。睡足平西紅日墜。煙燼博鑪山骨。甚功課古詩唐絕。跳出錦鱗千尺網。聽他張海底珊瑚鐵。六印佩。五車裂。

和稼軒詞用辛韻。

吾老是鄉矣。醉鄉睡鄉而外。醒時無幾。六一先生齋中物。便作開門七事。奈見獵猶然心喜。除却平原絲繡像。又未知肝膽向誰是。欲把贈。誰堪似。撚髭長嘯西風裏。想稼軒凌雲意氣。揮毫情味。落句鏗然金石響。殊勝新桐初理。豈屑效劉卿錢起。萬古詞人無敵手。只使君之後惟孤耳。甯鹿鹿。數餘子。

白苧

本意。用元人韻。

山鳥啼。采越葛。山閒落落。香篝貯火。恐到黃梅雨惡。輕風吹。玉纖金斗熨羅幕。銀翦入生綃。蹙半幅澄江魚躍。相思鍼孔。朱吐丁香略略。不抵防唾痕點暈紅櫻萼。記昨春衫一角。欲剔燈花。細看雙蒂。疼惜春尖嫩削。幾次裏停鍼。青煤灑却。正迷離倦眼。烏驚鈴索。誤玉人半晌相逢。殘夢深閣。奈天涯人遠孤衾薄。

題余氏女子繡西子浣紗圖。遙和程邨阮亭諸公。

罨畫中。繞匹練。谿流明靜。色絲妙絕。搦得苧羅小影。浣溪沙。青苔石髮照容鬢。眉黛蹙興亡。剪一半吳江波冷。紅衣落盡。越女含情多恨。怕無端騷人繪士臨圖本。顰後沼吳一瞬。渲點清臚。仙鍼九孔。難刺捧心愁病。訝淡粧濃抹。淺深不定。重劈縷分芒。追思幽靚。問當年女伴若邪。箇人誰姓。恐無鹽刻畫爭分寸。

金明池

春遊和淮海。

紫陌花橫。青郊柳直。寶馬紅塵一路。馳道上和風淡蕩。落紅過點點似雨。粉牆頭掩映秋千。露半幅裙角彩雲飛處。聽墜釧如尋。流蘇疑動。語燕雙歌雙舞。傍水桃花嬌無主。恰婀娜含情。巧留人住。花教住玉驄且住。愁漫訴伯勞休訴。一霎時攪亂春心。煞怪是啼鶻惱人的苦。把折得花枝。可人分贈。莫帶將愁歸去。

春風裊娜

和伯旃春感。

剛春眠雙笑。夢裏人歸。幽夢斷。落紅飛噴。紅兒亡賴。情知夢好。故掇花朵。不打黃鸝。道是無情。幾回偷眼。箇裏春情伊索知。著意梳頭學顰黛。無人背地澣紅衣。懊惱東風薄倖。無人憐惜。闌干上花影頻

移。將紅豆。寄相思。賺人幾度。門外獶兒。臂側游仙。粧凝半枕。被頭繡領。淚滴雙池。去年花下。記分明執手。消停這歇。雞未鳴時。

蘭陵王

詠柳和美成。

汴河直。官柳兩行曳碧。能禁得幾度別離。落日津亭淡無色。飄零况去國。憔悴多情逐客。風流散。春暗鳳城。韋杜參差去天尺。浮萍轉行跡。憶馬滑霜濃。花媚當席。月圓翻作如鉤食。隨一片飛絮。幾程茅店。折梅從此斷戎驛。恨天限南北。愴惻。寸心積。莫別後經秋。爲我愁寂。攀條執手情何極。且暫繫征棹。慢吹離笛。怕樽中酒。袂上雨。雜淚滴。

瓶中桃杏爭妍賦賞

杏花早。剛是春分過了。畫樓上幾度玉人。翠袖凝粧倚春曉。掃眉新

樣巧。又見碧桃一笑。紅肩並。兒鶯子燕。匹配東風豔陽鬧。相憐故相照。縱減瘦三分。也成二妙。少一句怕鏡中人妬。畫中人錯。箇中約略誰較好。也難判多少。嬌小。各波俏。向畫影雙鉤。百媚難討。韶華透出風情稿。恐粉褪黃落。蜂殤蝶死。損花懷抱。合二美。無月老。

### 西平樂

#### 馬嘯城春望

烏夜邨南。馬嘯城北。樓頭卽是天涯。一帶寒蕪。數行平楚。遠山淡抹濃遮。問秦徑美人何處。昔日舞衣可在。綵灰胡蝶飛飛。未知吹落誰家。鏡裏澄波海月。照人憔悴。玉枕寒沙。多情燕子。雙來雙去。賣錫天氣。攪碎梨花。多應是紙鳶黏恨。故惹游絲。閒把落紅牽曳。亂打秋千。不管堆蟬兩鬢斜。細數春來。幾番花信。花外朱扉。花底雕闌。花上流鶯。流光送盡鉛華。



阮亭云。此調一百三十餘字。止用七韻。字面韻脚。最難妥叶。阮亭謂難於押韻。愚謂不難叶韻。難於一氣旋轉。不可閒斷。始工。足云。

多麗

憶湖上

去年秋。移家曾到湖頭。正西風。山山黃葉。飄零偏打秦樓。翠嫣然。西施斂黛。渾銷瘦。蘇小含愁。無限湖山。那堪回首。柳枝爭似舊風流。問當日。舞鬟歌豔。衰草亂汀洲。空腸斷。酒醒花倦。同睡蘭舟。任芙蓉。紅衣冷落。不關谿鷺沙鷗。萬松前。故宮何處。兩高外。殘照將收。風雨多情。煙波有恨。江聲日夜幾時休。暗想昔時心事。人月兩悠悠。休重把新愁釣起。初月如鉤。

怨朱絃

送羨門弟遊黃山

趁春流一葉輕航。君過桐江。爲我寄聲。釣磯亡恙。雲山依舊蒼蒼。西去藤谿。三天子障。江聲不到錢唐。向梅鎖城上。南望烏聊。筍拔篔簹。三十六峰屏障。二十四谿環玦。水調笙簧。爲君掃黃山片石。梯壁雲牀。追憶起竹馬時年。曾隨紗帳。虎跳鱸堂。子墨塗鴉。女牆掘鼠。上屋中郎。庭虛過鯉。木壞空梁。惆悵舊時陳迹。細數徧五十三秋。雙鬢滄浪。君到武谿深處。攫取紫雲龍尾。照耀歸裝。生俊煞烏紗郵樣。紅粉喬粧。舊朝新安人。止破鈔於烏紗帽。紅繡幘。此外不名一錢。

阮亭謂此調染指甚少。因戲爲之。

### 三臺

#### 聞畫眉啼作

正春眠睡起無緒。不喜窗禽催曙。悔小時倩婢教鸚哥。偏念誦傷心詩句。花陰下。顧影低鬟語。原不爲惜花早起。儘生受一捻腰支。怕不

數十分憔悴。况雕闌畫眉聒絮。銷盡遠山濃翠。忽忽裏斷送幾殘春。  
支值綠零紅碎。畫眉夫婿遠天涯去。全不管鶯嬌燕乳。早難道花  
外鷓鴣。偏不到薄情人處。寄驛使殘月梅梢。尺書斷腸魚尾。料情人  
不是不歸來。恐春色不留儂住了。茶蘼花事楊花雨。更一絲兩絲牽  
曳。拚今夕單枕夢回。伴殘缸花尖燈背。

哨徧

用丁奇遇花燭詞韻。爲倚天姪。

珠簾圍繡。交窗疏綺。去盡形骸累。從頭算。日日數花期。剛只箇今朝  
正是。排一對。鳳背絳紗燈引。鴉鬟捧扇俱韶穉。覩釵轟紅兜。瓔垂粉  
耳。打點銷魂從此。沈沈網戶暗朱扉。漸蜃脂低亞燭花飛。喜媪催眠。  
小姑先去。已知人意。便神仙也。甘謫墜生生共塵世。人閒美滿。受  
清供雨滋雲味。莫漏洩小春。梅梢青帝。屏山十二寒如水。儘玉枕奇

溫。隨郎轉側。紅日紗幮上矣。卻衆裏低頭佯整瓊珮。有無限含情匿  
笑時。欲將息才郎無計。幾度暗呼小玉。手語郎何處。虧他準折紅鸞  
天喜。驀地偷駿心醉。間思可奈昨宵何。顫金鈎流蘇未止。

戚氏

贈盛八南樵

席爲門。家徒四壁不知貧。閒思往事。悵悵惆悵莫重論。笑顛毛種種。  
頭顛欲擲向何人。當日酒衫歌袖。知幾度輕付銷魂。豪傑灰飛。風流  
雲散。烏衣燕子斜曛。悔愛姬換馬。賣刀買藥。乞食尋眞。此地戰血  
猶新。魚腸繡蠟。狗盜已黃塵。多半作國殤大厲。山鬼叢神。只逃名。軹  
里留得腰身。削漿聊給晨昏。壚頭犢鼻。衲頭糞掃。非傭非丐非髡。  
千篇詩句在。飢來難煮。兒女啼嗔。自有撐腸白石。懶蹲鴟山下。斷雲  
根。猶然俠氣干雲。博徒馬俠。緩急曾無吝。羞依傍名下諸廚俊。避彈

射隼鶴移文。一此三逼窄乾坤。好難容傲骨與吟魂。糟邱坐隱。爛柯  
功業。麴部階勳。

武原彭拜仁先生。爲明太常節愍公期生子。公視贛州兵備事。城破死難。先生閒關兵燹。冒白刃。求遺骨。有江右義士。負骸送歸。乃杜門奉母不出。先生少以選貢入成均。與羨門少宰並有才名。平生耿介自守。孝行聞於時。鄉人私諡考介先生。濟南王文簡稱其詩。宏探奧衍。窮變極奇。尤工倚聲。茗齋詩餘二卷。俊爽婉媚。兼而有之。實擅南北宋之長。閒有閒情側豔之作。亦屬詞家之常。昔尤悔菴檢討題羨門延露詞云。彭子與王子阮亭無題唱和。嘆其淫思古意。兩玉一時。蓋卽美人香草之遺。借以抒其幽鬱之情。詞家固不以爲嫌。則茗齋之詞。當與延露並傳矣。道光丙申秋孟。海昌蔣光煦跋。

中華民國二十六年五月初版  
中華民國二十六年五月再版

(84006.1)

國學基  
本叢書  
茗齋詩餘一冊

本書實價國幣叁角

外埠酌加運費匯費

著者 彭孫貽

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

周

(本書校對者李家超)

上海图书馆藏书



A541 212 0006 1798B



